

四庫全書

子部

欽定四庫全書

子部

證治準繩卷一百二十

詳校官太醫院恩糧臣袁天錫

編修臣倉聖脈覆勘

總校官進士臣朱鈴

校對官中書臣李斯咏

謄錄監生臣薛炳文

欽定四庫全書

證治準繩卷一百二十

明 王肯堂 撰

外科

損傷門

腰脊痛

地龍散 治腰脊痛或打撲損傷從高墜下留在太陽

經中令人腰脊或脛膂臂腰中痛不可忍

地龍 官桂

蘇木

各九分

麻黃

七分黃蘗

當歸梢

甘草

各一錢半

桃仁

九箇

右作一服水二鍾煎至一鍾食前服

戴復菴云癰撲傷疼酒調琥珀散極佳再有烏藥順氣散用以治之風腰疼尤宜有癰撲人服藥并熏洗搽貼藥皆不効自若或教以用白芍藥赤芍藥威靈仙乳香沒藥等分為末和勻酒調服隨即痛減其半

腹痛或大便不通按之痛甚瘀血在內也用加味承氣

湯下之既下而痛不止按之仍痛瘀血未盡也用加味
四物湯補而行之若腹痛按之不痛血氣傷也用四物
湯加參芪白朮補而和之若下而胸脇反痛肝血傷也
用四君芎歸補之既下而發熱陰血傷也用四物參朮
補之既下而惡寒陽氣傷也用十全大補湯補之既下
而惡寒發熱氣血俱傷也用八珍湯補之既下而欲嘔
胃氣傷也用六君當歸補之既下而泄瀉脾腎傷也用
六君肉果破故紙補之若下後手足俱冷昏憤出汗陽

氣虛寒也急用參附湯吐瀉手足俱冷指甲青者脾腎
虛寒之甚也急用大劑參附湯口噤手撒遺尿痰盛唇
青體冷者虛極之壞證也急投大劑參附湯多有得生
者 有一患者杖後服四物紅花桃仁大黃等劑以逐
瘀血腹反痛更服一劑痛益甚按其腹不痛薛曰此血
虛也故喜按而不痛宜溫補之劑遂以歸身白朮參芪
炙草二劑痛即止 有一患者仲秋夜歸墜馬腹內作
痛飲酒數杯翌早大便自下瘀血即安此元氣充實挾

酒勢而行散也 一男子跌傷腹痛作渴食梨子二枚
益甚大便不通血欲逆上用當歸承氣湯加桃仁瘀血
下而瘥此因元氣不足瘀血得寒而凝聚也故產婦金
瘡者不宜食此 一男子孟秋墜梯腹停瘀血用大黃
等藥其血不下反加胸膈脹痛喘促短氣薛用肉桂木
香末各二錢熱酒調服即下黑血及前所服之藥而甦
此因寒藥凝滯而不行故用辛溫之劑散之 陳侍御
墜馬腿痛作嘔服下藥一劑胸腹脹痛按之即止惟倦

怠少氣診其脈微細而濇予曰非瘀血也乃痛傷氣血復因藥損脾氣而然耳投養脾胃生氣血之藥而愈

加味承氣湯 治瘀血內停胸腹脹痛或大便不通等

證

大黃

朴硝

錢各二

枳實

厚朴

當歸

紅花

各一

錢

甘草

分五

用酒水各一鍾煎至一鍾服仍量虛實加減病急不用

甘草

垣定痛乳香神應散 治從高墜下疼痛不可忍腹中疼痛

乳香 沒藥 雄黑豆 桑白皮 獨科栗子

當歸

各一兩

破故紙

炒二兩

水蛭

半兩

右為末每服五錢醋一盞砂石器內煎至六分入麝香少許溫服

小腹引陰莖作痛有一患者瘀血失砭脹痛煩渴縱飲冷童便渴脹頓止以蘿蔔細搗塗之瘀血漸散已而患

處作癢仍塗之癢止後口乾作渴小腹引陰莖作痛小便如淋時出白津此肝經鬱火也遂以小柴胡湯加大黃黃連山梔飲之諸證悉退再用養血等藥而安夫小腹引陰莖作痛等證往往誤認為寒證投以熱劑則諸竅出血或二便不通以及危殆輕亦損其目矣

肌肉間作痛營衛之氣滯也用復元通氣散筋骨作痛肝腎之氣傷也用六味地黃丸內傷下血作痛脾胃之氣虛也用補中益氣湯外傷出血作痛脾肺之氣虛也

用八珍湯大凡下血不止脾胃之氣脫也吐瀉不食脾胃之氣敗也苟預為調補脾胃則無此患矣

創口痛若痛至四五日不減或至一二日方痛欲作膿也用托裏散若以指按下復起膿已成也刺去其膿痛自止若頭痛時作時止氣血虛也痛而兼眩屬痰也當生肝血補脾氣 有一患者患處脹痛悲哀忿怒此厥陰之火為七情激之而然耳遂砭去瘀血以小柴胡湯加山梔黃連桔梗而安後用生肝血養脾氣之藥瘡潰

而歛 戴給事墜馬腿腫痛而難忍食少倦怠此元氣
虛弱不能運散瘀血而然耳遂用補中益氣去升麻柴
胡加木瓜茯苓芍藥白朮治之而痊 儒者王清之跌
腰作痛用定痛等藥不愈氣血日衰面目黧色薛曰腰
為腎之府雖曰閃傷實腎經虛弱所致遂用杜仲補骨
脂五味山茱萸蓉山藥空心服又以六君當歸白朮神
麴各二錢食遠服不月而瘥 一三歲兒閃腰作痛服
流氣等藥半載不愈薛曰此稟腎氣不足不治之證也

後果歿

瘀血作痛有一患者腫痛發熱作渴汗出薛曰此陰血受傷也先砭去惡穢以通壅塞後用四物柴胡黃芩山梔丹皮骨碎補以清肝火而愈 有一患者傷處揉散惟腫痛不消薛曰此瘀血在內宜急砭之不從薛以蘿蔔自然汁調山梔末傅之破處以當歸膏貼之更服活血之劑而瘥數年之後但遇天陰仍作痒痛始知不砭之失 有一患者臀腿黑腫而皮不破但脹痛重墜皆

以為內無瘀血惟傳涼藥可以止痛薛診其尺脈濇而結此因體肥肉厚瘀血蓄深刺去即愈否則內潰有爛筋傷骨之患薛入針四寸漂黑血數尺腫痛遂止是日發熱惡寒煩渴頭痛此氣血俱虛而然也以十全大補之劑遂瘥 一男子閃傷右腿壅腫作痛薛謂急砭去滯血以補元氣庶無後患不信乃外傳大黃等藥內服流氣飲後湧出穢膿數碗許其膿不止乃復請治視其腿細而脈大作渴發熱辭不治後果歿 憲友王汝道

環跳穴處閃傷瘀血腫痛發熱作渴遂砭去瘀血知其
下焦素有虛火用八珍加黃蘗知母牛膝骨碎補四劑
頓止用十全大補湯少加黃蘗知母麥門五味三十餘
劑而斂

血虛作痛一婦人磕臂出血骨痛熱渴煩悶頭暈日晡
益甚此陰虛內熱之證用八珍加丹皮麥門五味骨碎
補肉桂及地黃丸治之悉愈却去桂加牛膝續斷二十
餘劑而瘡愈

骨傷作痛一小兒足傷作痛肉色不變傷在骨也頻用炒葱慰之五更用和血定痛丸日間用健脾胃生氣血之劑數日後服地黃丸三月餘而瘥一小兒臂骨出臼接入腫痛發熱服流氣等藥益甚飲食少思薛以葱熨之其痛即止以六君子黃芪柴胡桔梗續斷骨碎補治之飲食進而腫痛消又用補中益氣加麥門五味治之氣血和而熱退愈矣

沒藥丸 治打撲內損筋骨疼痛

沒藥 乳香 川芎 川椒

去目及合口者

芍藥 當歸

各半 自然銅

二錢半火燒醋淬七次

右為細末用黃蠟二兩鎔開入藥末不住手攪勻丸如彈子大每服一九用好酒一鍾化開煎至五分乘熱服之隨痛處卧連服二三丸立効

濕痰作痛大宗伯沈立齋孟冬閃腰作痛胸間痰氣不利以枳殼青皮柴胡升麻木香茴香當歸川芎赤芍神麴紅花四劑而瘥但飲食不甘微有潮熱以參芪白朮

陳皮白芍各一錢歸身二錢川芎八分軟柴胡地骨炙
草各五分十餘劑而康 劉尚寶體肥臂閃作痛服透
骨丹反致肢節俱痛下體益甚以二陳南星羌活防風
牛膝木瓜蒼朮黃芩黃蘗治之身痛遂安以前藥再加
歸尾赤芍桔梗治之而瘥 鄭吏部素有濕痰孟冬墜
馬服辛熱破血之藥偏身作痛發熱口乾脈大而滑此
熱劑激動痰火為患耳治以清燥湯去人參當歸黃芪
加黃芩山梔半夏黃蘗熱痛頓去患處少愈更用二陳

羌活桔梗蒼朮黃蘗薑製生地當歸遂痊

肝火作病楊司天骨已入臼患處仍痛服藥不應肝脈
洪大而急薛曰此肝火盛而作痛也用小柴胡湯加山
梔黃連二劑痛止用四物山梔黃蘗知母調理而康
有一患者瘀血內脹厥痛發熱口乾作渴飲食不甘四
肢倦怠薛曰此肝火熾盛脾土受制故患前證喜其稟
實年壯第用降火清肝活血之劑而愈

青腫不消青腫不消用補中益氣湯以補氣腫黯不消

用加味逍遙散以散血若焮腫脹痛瘀血作膿也以八珍湯加白芷托之若膿潰而反痛氣血虛也以十全大補湯補之若骨髁接而復脫肝腎虛也用地黃丸腫不消青不退氣血虛也內用八珍湯外用葱熨法則瘀血自散腫痛自消若行血破血則脾胃愈虛運氣愈滯若數貼涼藥則瘀血益凝內腐益深致難收拾 一婦人閃臂腕腫大已三月手臂日細肌瘦惡寒食少短氣脈息微細屬形病俱虛也遂投補中益氣加肉桂引諸藥

以行至臂再加貝母香附以解久病之鬱間服和血定
痛丸以葱熨之腫消二三因怒患處仍脹胸膈兩脇微
痛以前湯更加木香山梔半夏桔梗服之少可復因驚
不寐少食盜汗以歸脾湯加五味麥門二十餘劑而安
腫消三四手臂漸肥但經水過期而少此心脾之血尚
未充足而然也乃用八珍加五味麥門丹皮遠志香附
貝母桔梗四十餘劑諸證悉愈後因怒發熱譫語經水
如湧此怒動肝火以小柴胡湯加生地黃二錢一劑遂

止以四物加柴胡調理而康 州守陳克明子閃右臂
腕腫痛肉色不變久服流氣等藥加寒熱少食舌乾作
渴薛曰傷損等證腫不消色不變此運氣虛而不能愈
當助脾胃壯氣血為主遂從薛法治之不二月形氣漸
充腫熱漸消半載諸證悉退體臂如常 一小兒閃腿
腕壅腫形氣怯弱薛欲治以補氣血為主佐以行散之
劑不信乃內服流氣飲外傳寒涼藥加寒熱體倦薛曰
惡寒發熱脈息洪大氣血虛極也治之無功後內潰瀝

盡氣血而亡 李考功子十四歲脚腕閃傷腫而色天
日出清膿少許肝脈微瀉此肝經受傷氣血虛而不能
潰難治之證也急止剋伐之劑不信乃雜用流氣等藥
後果出爛筋而死

腐肉不潰或惡寒而不潰用補中益氣湯發熱而不潰
用八珍湯若因剋伐而不潰者用六君子湯加當歸其
外皮黑堅硬不潰者內火蒸灸也內服八珍湯外塗當
歸膏其死肉不能潰或新肉不能生而致死者皆失於

不預補脾胃也 有一患者瘀血已去飲食少思死肉
不潰又用托裏之藥膿稍潰而清此血氣虛也非大補
不可彼不從薛強用大補之劑飲食進而死肉潰但少
寐以歸脾湯加山梔二劑而寐因勞心煩躁作渴脈浮
洪大以當歸補血湯二劑而安 有一患者受刑太重
外皮傷破瘀血如注內肉糜爛黯腫上引胸背下至足
指昏憤不食隨以黑羊皮熱貼患處灌以童便酒薄粥
更以清肝活血調氣健脾之劑神思稍蘇始言偏身強

痛又用大劑養血補氣之藥腫消食進時仲冬瘀血凝結不能潰膿又用大補之劑壯其陽氣其膿方熟遂砭去洞見其骨塗以當歸膏及服前藥百餘劑肌肉漸生少宗伯劉五清膝傷一塊微痛少食用六君子湯倍加當歸黃芪其痛漸止月餘瘀血內涸而不潰公以為痊予曰此陽氣虛極須用調補不從至來春頭暈痰涎壅塞服清氣化痰病勢愈盛脈洪大而微細欲以參芪歸朮附子之類補之不信至秋初因怒昏憤而厥

新肉不生若患處天白脾氣虛也用六君芎歸患處緋
赤陰血虛也用四物參朮若惡寒發熱氣血虛也用十
全大補湯膿稀白而不生者脾肺氣虛也用補中益氣
湯膿稀赤而不生者心脾血虛也用東垣聖愈湯寒熱
而不生肝火動也用加味道遙散晡熱而不生肝血虛
也用八珍牡丹皮食少體倦而不生脾胃氣虛也用六
君子湯膿穢而不生者陰虛邪火也用六味地黃丸四
肢困倦精神短少而不生者元氣內傷也用補中益氣

湯如夏月用調中益氣湯作瀉用清暑益氣湯秋令作瀉用清燥湯 有一患者潰而不斂以內有熱毒欲用寒涼之藥薛曰此血氣俱虛而不能斂耳非歸朮參芪之類培養脾土則肌肉何由而生豈可復用寒涼尅伐之藥重損氣血耶遂用前藥治之而愈

出血若患處或諸竅出者肝火熾盛血熱錯經而妄行也用加味逍遙散清熱養血若中氣虛弱血無所附而妄行用加味四君子湯補益中氣或元氣內脫不能攝

血用獨參湯加炮薑以回陽如不應急加附子或血蘊於內而嘔血用四物加柴胡黃芩凡傷損勞碌怒氣肚腹脹悶誤服大黃等藥傷陽絡則為吐血衄血便血尿血傷陰絡則為血積血塊肌肉青黯此臟腑虧損經墜失職急補脾肺亦有生者但患者不悟此理不用此法惜哉 張地官墜馬傷腿服草烏等藥致衄血欬嗽臂痛目黃口渴齒痛小便短少此因燥劑傷肺與大腸而致薛用生地苓連黃蘗知母山梔山藥甘草以潤肺之

燥而生腎水小便頓長諸證並止以山藥五味麥門參
芪芍歸黃蘗黃芩知母炙草以滋陰血養元氣而瘡歛
俞進士折腿骨已接三月尚發熱出血不止正體醫
治不應左關脈洪數此肝火熾甚血得熱而妄行也遂
投小柴胡湯加山梔芍藥生地防風血止熱退又用八
珍五味麥門治之瘡口即愈 田宗伯姪仲秋因怒跌
仆偏身作痛發熱衄血肝脈弦洪薛曰久衄脈弦洪乃
肝火盛而制金也至春則肝木茂盛而自焚或戕賊脾

土非易治之證當滋腎水以生肝木益脾土以生肺金
乃雜用瀉肝火等藥歿於仲春之月大尹劉國信金
瘡出血發熱煩躁屬陰虛為患用聖愈湯治之虛火息
而血歸經矣梁閣老姪金瘡腫痛出血不止寒熱口
乾此氣虛血無所附而血不歸經也用補中益氣五味
麥門主之陽氣復而愈

瘀血泛注有一患者瘀血流注腰脅兩足俱黑隨飲童
便酒砭出瘀血糜肉投以小柴胡湯去半夏加山梔苓

連骨碎補以清肝火用八珍茯苓以壯脾胃死肉潰而
新肉生後瘡復潰得靜調治年餘而痊 有一患者瘀
血攻注陰囊潰而成漏膿水清稀所服皆寒涼之劑診
其肝脈短濇餘脈浮而無力此肝木受肺金剋制又元
氣虛不能收斂遂用壯脾胃生氣血之方元氣少復後
終歿於金旺之日

昏潰傷重昏潰者急灌以獨參湯雖內瘀血切不可下
急用花蕊石散內化之恐因瀉而亡陰也若元氣虛甚

者尤不可下亦用以前散化之凡瘀血在內大小便不通
用大黃朴硝血凝而不下者急用木香肉桂末三二
錢以熱酒調灌服血下乃生如怯弱之人用硝黃須加
肉桂木香同煎假其熱以行其寒也 一婦人孟冬傷
足亡血頭汗內熱作渴短氣煩躁不時昏憤其脈洪大
按之微弱此陰血虛於下孤陽炎於上故發厥而頭出
汗也以四物合小柴胡湯一劑汗即止以四物去川芎
加參芪麥門五味炙草少用肉桂四劑諸證悉去又三

十餘劑血氣復而愈

男子孟夏折腿出血過多其初眩暈眼花後則昏憤此陰血傷損陽火熾甚制金不能平木木旺生風所致急灌童便更用人參當歸各五錢荊芥川芎柴胡芍藥白朮各二錢山梔黃蘗黃芩桔梗各一錢甘草五分服之隨藥又用四物參芪各三錢生地柴胡各一錢四劑煩躁悉去

眩暈有一患者腹脹嘔吐眩暈用柴胡黃芩山梔紫蘇

杏仁枳殼桔梗川芎當歸赤芍紅花桃仁四劑而定後
又出血過多昏憤目黑用十全大補等藥而蘇時肌肉
潰爛膿水淋漓筋攣骨痛薛切其脈浮而濇沉而弱此
因氣血耗損不能養筋筋虛不能束骨遂用養氣血之
藥治之而愈 有一患者杖瘡愈後失於調理頭目不
清服祛風化痰等藥反眩暈服牛黃清心丸又肚腹疼
痛杖痕腫痒發熱作渴飲食不思痰氣上升以為杖瘡
餘毒復作診左尺脈洪大按之如無薛曰此腎經不足

不能攝氣歸源遂用人參黃芪茯苓陳皮當歸川芎熟地山藥山茱萸五味麥門灸草服之而尋愈後因勞熱渴頭痛倦怠少食用補中益氣湯加麥門五味而痊煩躁有一患者兩脇脹悶欲欬不欬口覺血腥偏身脣腿脹痛倦怠不食煩渴脈大此血脫煩躁也與童便酒及砒患處出死血糜肉甚多忽發熱煩躁汗出投以獨參湯三劑少止又用補氣血清肝火之藥數劑飲食稍進後用獨參湯間服諸證悉退飲食頓加但不能多寐

以歸脾湯加山梔竹茹四劑而熟睡因勞心遂煩渴自汗脈大無力以當歸補血湯二劑而安又以十全大補去川芎加麥門五味牡丹地骨麻黃根炒浮麥數劑而汗止死肉且潰又二十餘劑而新肉生有一患者煩躁面赤口乾作渴脈洪大按之如無薛曰此血虛發躁也遂以當歸補血湯二劑即止後日晡發熱更以四物加柴胡牡丹地骨黃蘗知母治之熱退而瘡斂東垣云發熱惡寒大渴不止其脈大而無力者非白虎湯證此

血虛發躁也宜用當歸補血湯治之裴先生云肌熱躁
熱目赤面紅其脈洪大而虛此血虛也若誤服白虎湯
輕則危重則斃有一患者頭額出汗熱渴氣短煩躁
骨痛瘀肉不潰遂割去之出鮮血服芩連之藥益甚其
脈洪大而微此氣血俱虛邪火熾盛所致以四物加參
芪朮炙草少用柴胡炒芩二劑頭汗頓止又加麥門五
味肉桂二劑諸證悉退後用參芪歸朮炒芍熟地麥門
五味十餘劑瘀血潰而膿水稠矣但新肉不生以前藥

倍用白朮而斂 吳給事墜馬傷首出血過多發熱煩躁肉潤筋惕或欲投破傷風藥予曰此血虛火動所致當峻補其血為善遂用聖愈湯二劑即安又養氣血而瘡瘥 張進士季秋墜馬亡血過多出汗煩躁翌日其汗自止熱躁益甚口噤手顫此陰血虛陽火乘之而汗出為寒氣收斂腠理故汗不得出火不得泄怫鬱內甚而益增他證也予用四物加柴胡黃芩山梔四劑少止又用四物參芪軟柴胡五味麥門治之而痊

發熱若出血過多或潰膿之後脈洪大而虛重按全無此陰虛發熱也用當歸補血湯脈沉微按之軟弱此陰盛發躁也用四君薑附若發熱煩躁肉瞤筋惕亡血也用聖愈湯如汗不止血脫也用獨參湯其血脫脈實汗後脈躁者難治細小者易治外臺秘要云陰盛發躁欲坐井中用附子四逆湯加蔥白王太僕先生云凡熱來復去晝見夜伏夜見晝伏不時而動者名曰無火此無根之虛火也 楊進士傷手指焮痛發熱服寒涼之藥

致飲食頓減患處不潰薛用托裏養血之藥食進瘡潰
後因勞每日晡發熱此陰虛而內熱也以四物軟柴胡
地骨皮乃退更用養氣血之藥而瘡斂 一男子墜馬
腹有瘀血服藥下之致發熱盜汗自汗脈浮濇薛以為
重劑過傷氣血所致投以十全大補湯益甚時或譫語
此血力未及而然也以前藥加炮附子五分服之即睡
覺來頓安再劑而痊 舉人余時正金瘡焮痛出血不
止惡寒發熱用敗毒等藥愈甚此亡血過多氣無所附

而然耳遂以四物黃蘗知母軟柴胡玄參五味麥門治之即愈 一女子年十七閃右臂微腫作痛寅申時發熱薛決其膽經血虛火盛經水果先期而至先以四物合小柴胡湯四劑熱退更以加味四物湯加香附地骨皮山梔各五分芩連炙草各三分二十餘劑其腫亦消乃去黃連山梔又五十餘劑經水調而元氣充矣

陽氣脫陷梁閣老姪跌傷腿外敷大黃等藥內服破血之劑遂致內潰薛針出穢膿三椀許虛症悉具用大補

之劑兩月餘少能步履因勞心手撒眼閉汗出如水或欲用祛風之劑薛曰此氣血尚未充足而然也急以艾炒熟頻熨肚臍并氣海穴處以人參四兩炮附子五錢煎灌良久臂少動又灌一劑眼開能言但氣不能接續乃以參芪歸朮四味共一斤附子五錢水煎徐徐服之元氣漸復飲食已進乃去附子服之而瘡愈

胃腹痛悶跳躍捶胸悶倒舉重勞役恚怒而胃腹痛悶喜手摸者肝火傷脾也用四君柴胡山梔畏手摸者肝

經血滯也用四物柴胡山梔桃仁紅花若胸脇作痛發
熱晡熱肝經血傷也用加味逍遙散若胸脇作痛飲食
少思肝脾氣傷也用四君芎歸柴梔丹皮若胸腹脹滿
飲食少思肝脾氣滯也用六君加柴胡芎歸若胸腹不
利食少無寐脾氣鬱結也用加味歸脾湯若痰氣不利
脾胃氣滯也用二陳白朮芎歸梔子青皮若咬牙發搐
肝旺脾虛也用小柴胡湯川芎山梔天麻釣藤鈎或用
風藥則肝血益傷肝火益甚或飲糖酒則腎水益虛肝

火愈熾若用大黃等藥內傷陰絡反致下血少壯者必為痼疾老弱者多致不起

作嘔若因痛甚或因尅伐而傷胃者用四君當歸半夏生薑或因忿怒而肝傷者用小柴胡湯加山梔茯苓若因痰火盛用二陳薑炒黃連山梔若因胃氣虛用補中益氣湯生薑半夏若出血過多或因潰後用六君子湯加當歸 有一患者痛甚發熱嘔吐少食胸膈痞滿用行氣破血之劑益甚口乾作渴大便不調患處色黯薛

曰此痛傷胃氣所致遂以四君當歸炒苓軟柴藿香二劑諸證漸愈又用大補之劑潰之而瘳 有一患者發熱熾痛服寒涼藥更加口乾作渴肚腹亦痛自以為瘀血欲下之薛按其肚腹不脹脈微細而遲飲食惡寒此涼藥傷胃而然也急用六君加芍藥當歸炮附子各一錢服之前證益甚反加譫語面赤薛意其藥力未至耳前藥再加附子五分服之即睡覺來諸病頓退而安一膏粱之人跌腿青腫作痛服辛熱之藥反發熱作喘

患處益痛口乾脣揭薛曰膏粱之人內多積熱更服辛
熱之劑益其胃火而使然也頻飲童便以清胃散如山
梔黃芩甘草治之頓止患處以葱熨之腫即消散一
婦人傷指手背俱腫微嘔少食彼以為毒氣內攻診其
脈沉細此痛傷胃氣所致也遂刺出膿碗許先以六君
藿香當歸而食進繼以八珍黃芪白芷桔梗月餘而瘡
愈

嘔吐黑血加味芎藭湯 治打撲傷損敗血流入胃脘

嘔吐黑血如豆汁

芎藭

當歸

白芍藥

百合

水浸一日

荊芥

各二錢

右作一服水一鍾半酒半鍾煎至八分不拘時服

百合散 治打撲傷損敗血流入胃腕嘔黑血汁者

川芎

赤芍藥

當歸

百合

生地黃

側柏

葉

荊芥

犀角

牡丹皮

黃芩

黃連

梔

子

鬱金

大黃

右水煎加童便和服 大便利者去大黃

喘欬若出血過多面黑胸脹或胸膈痛而發喘者乃氣虛血乘於肺也急用二味參蘇飲若欬血衄血者乃氣逆血蘊於肺也急用十味參蘇飲加山梔苓連蘇木

舉人杜克弘墜馬服下血藥反作喘日晡益甚此血虛所致耳非瘀血為患遂以四物加參芪五味參門治之其喘頓止又用補中益氣加五味參門而愈此證果係瘀血蒸熏於肺而喘只宜活血行血亦不可下若面黑胸脹或膈痛作喘當用人參一兩蘇木二兩作一劑水

煎急服緩則不治產婦多有此疾

二味參蘇飲 治出血過多瘀血入肺面黑喘促

人參

一蘇木二兩

右水煎服

十味參蘇飲 治氣逆血蘊上焦發熱氣促或瘀血
血或痰嗽不止加黃芩山梔即加味參蘇飲

人參 紫蘇 半夏 茯苓 陳皮 桔梗 前

胡 葛根

枳殼

各一錢

炙甘草

五分

右薑水煎服

作渴若因出血過多，用四物參朮如不應，用人參黃芪以補氣，當歸熟地以養血。若因潰後，用八珍湯。若胃熱傷津液，用竹葉黃芪湯。胃虛津液不足，用補中益氣湯。胃火熾盛，竹葉石膏湯。若煩熱作渴，小便淋瀝，乃腎經虛熱，非地黃丸不能救。有一患者，瘀血雖去，飲食形氣如故，但熱渴煩痛，膈痞有痰，以小柴胡湯加天花粉、貝母、桔梗、山梔二劑，少愈。又加生地、歸尾、黃芩、柴胡、山

施花粉而愈薛治百餘人其杖後血氣不虛者惟此一人耳

大便秘結若大腸血虛火熾者用四物湯送潤腸丸或以豬膽汁導之若腎虛火躁者用六味地黃丸腸胃氣虛用補中益氣湯

手足傷損若元氣虛弱或不戒房勞或妄行攻伐致死肉上延或腐而不痛黑而不脫者當大補元氣庶可保生若手足節骱斷去者無妨骨斷筋連不急剪去若侵

及好肉則不治若預為調補脾氣則無此患大凡膿瘻
內焮者即針之而投托裏散或口噤遺尿而似破傷風
者急用十全大補湯加附子多有生者

手足疼痛有一患者愈後腿作痛薛意膿血過多瘡雖
愈肝經血氣尚未充實而濕熱乘虛也遂以八珍加牛
膝木瓜蒼朮黃蘗防己炙草以祛風熱養陰血痛漸止
乃去防己黃蘗服之遂瘳

應痛丸 治折傷後為四氣所侵手足疼者

破故紙

骨碎補

去毛

蒼朮

生

草烏

各半斤

穿山甲

去膜

桑柴灰炒泡起
為度柴灰亦可

舶上茴香

炒各
六兩

右除草烏半斤用生薑一片搗爛同草烏一處淹兩
宿焙乾為末酒煮麴糊為丸如梧桐子大每服五十
丸用酒或米湯送下忌熱物片時

乳香散

治打傷損手足疼痛不可忍者

乳香

沒藥

各另研
三錢

白芷

二錢

肉桂

五錢

白朮

當歸

各五錢
炒粉草

右為細末研勻每服二錢不拘時酒調下

破傷風河間云風證善行數變入臟甚速死生在反掌之間宜急分表裏虛實而治之邪在表者則筋脈拘急時或寒熱筋惕搐搦脈浮弦用羌活防風湯散之在半表半裏者則頭微汗身無汗用羌活湯和之傳入裏者舌強口噤項背反張筋惕搐搦痰涎壅盛胸腹滿悶便溺閉赤時或汗出脈洪數而弦以大芎黃湯導之既下而汗仍出表虛也以白朮防風湯補之不時灌以粥飲

為善前云乃氣虛未損之法也若膿血太泄陽隨陰散
氣血俱虛而類前證者悉宜大補脾胃切忌祛風之藥
詳見雜病第五 有一患者仲夏誤傷手腰背反張
牙關緊急脈浮而散此表證也遂用羌活防風湯一劑
即解此證若在秋冬腠理緻密之時須用麻黃之類以
發汗此乃暴傷氣血不損之治法也 有一患者杖處
畧破而患此脈洪大而實此裏證也用大芎黃湯一劑
大便微行一次悉退若投表藥必死宜急分表裏虛實

而治之庶無誤矣 有一患者寒熱口乾用四物參芪
白朮輒柴炒苓麥門五味四劑少退薛欲砭去瘀血不
從後怔忡不寐飲食少思牙關牽緊頭目疼痛惡寒發
熱此膿內焮也遂砭去之即安以八珍棗仁麥門五味
二十劑前證漸愈又用前藥及獨參湯瘀肉漸潰後因
勞又少寐盜汗以歸脾湯麥門五味遠志而痊後牙關
脹悶面目焮赤又似破傷風仍以爲虛用八珍等藥亦
安 有一患者腹痛喘促作渴寒熱臀腿糜爛與死血

相和如皮囊盛糊用童便煎四物桃仁紅花柴胡黃芩
麥門花粉服之頓退彼用黑羊皮貼之益甚後砭去膿
血甚多氣息奄奄唇口微動牙關緊急患處色黯或欲
用破傷風藥薛曰此氣血虛而變症也用參芪芎歸白
朮并獨參湯人乳汁元氣復而諸症愈乃用十全大補
湯調理而安此證若膿瘀內焮者宜針之若潰後口噤
遺尿而類破傷風等證者乃氣血虛極也急用大補之
劑若素多痰患風證者宜清痰降火若因怒而見風證

者宜清肝降火若人不慎房勞而忽患前證此由腎水不足心火熾甚宜滋陰補氣血為主若誤作風證治之即死

羌活防風湯 治破傷風邪初在表者急服此藥以解之稍遲則邪入於裏與藥不相合矣

羌活 防風 甘草 川芎 藁本 當歸 芍

藥

各四兩

地榆

細辛

各二兩

右每服五錢水煎

防風湯 治破傷風表證未傳入裏急宜服之

防風 羌活 獨活 川芎

各等分

右每服五錢水煎調蜈蚣散服大効

蜈蚣散

蜈蚣

一對 鱗三錢

右為細末用防風湯調下

羌活湯 治破傷風在半表半裏急服此湯稍緩邪入

於裏不宜用

羌活 菊花 麻黃 川芎 石膏 防風 前

胡 黃芩 細辛 甘草 枳殼 白茯苓 蔓

荊子

各一兩

薄荷

白芷

各五錢

右每服五錢水煎

地榆防風散 治風在半表裏頭微汗身無汗不可發

汗兼治表裏

地榆 防風 地丁草 馬齒莧

各等分

右為細末每服三錢米湯調服

大芎黃湯 治風在裏宜踈導急服此湯

川芎 羌活 黃芩 大黃

各一兩

右五七錢水煎溫服臟腑通和為度

白朮防風湯 治服表藥過多自汗者

白朮 黃芪

各一兩

防風

二兩

右每服五七錢水煎服臟腑和而自汗者可服若臟腑秘小便赤者宜用大芎黃湯下之

白朮湯 治破傷風汗不止筋攣搐搦

白朮 葛根 升麻 黃芩 芍藥 甘草

各二兩 錢二

分五

右每服五錢水煎無時服

謙甫硃砂丸 治破傷風目瞪口噤不語手足搐搦項筋強直不能轉側目不識人

硃砂

研

半夏

洗

川芎

各一兩

雄黃

五錢

鳳凰臺

三錢

麝香

一字

右為末棗肉丸桐子大每服一九或二丸冷水下以

吐為度如不吐加一九或吐不住煎葱白湯止之汗
出為効

左龍丸 治直視在裏者

左盤龍

野鴿糞也

白殭蠶

鰾

各炒五錢

雄黃

一錢

右為末燒飯丸桐子大每服十五丸溫酒下如裏證
不已當用前藥末一半加巴豆霜半錢燒飯丸桐子
大每服加八一九如此漸加以利為度利後服和解

藥

江鯁丸 治破傷風傳入裏證驚而發搐臟腑秘澀

江鯁劉野鴿糞炒白殭蠶各半雄黃一錢蜈蚣一對天

麻一兩

右為末作三分二分燒飯丸桐子大硃砂為衣一分入巴豆霜一錢亦用燒飯丸每服硃砂者二十九丸入巴豆者一丸漸加至利為度後止服前丸

養血當歸地黃散

當歸 地黃 芍藥 川芎 藁本 防風 白

芷 各一兩 細辛 五錢

右依前煎服

廣利方 治破傷風發熱

括蕒子

九錢

滑石

三錢半

南星

蒼朮

赤芍藥

陳

皮

炒藥

黃連

黃芩

白芷

甘草

各五分

右薑水煎服

右二方用竹瀝括蕒實等治破傷風熱痰脈洪者前方用南星半夏川烏等則治破傷風寒痰脈無力者

白丸子 治一切風痰壅盛手足頑麻或牙關緊急口
眼歪斜半身不遂等證

半夏

七兩

南星

二兩

川烏

去皮臍五錢各生用

右為末用生薑汁調糊丸桐子大每服一二十九薑
湯下

本事玉真散 治破傷風及打撲傷損項強口噤欲死

南星有防風制其毒不麻人

天南星

湯泡七次

防風

等分

右為末先以熟童子小便洗淨瘡口拭乾摻之良久
渾身作痒瘡口出赤水是効又以溫酒調下一錢如
牙關緊急腰背反張用藥二錢童子小便調服至死
心頭微溫者急灌之亦可救累試累効

治打撲傷損腫痛傷風者

天南星 半夏 地龍

各等分

右為末用生薑薄荷汁調搽患處

急風散 治新舊諸瘡破傷中風項強背直腰反折口

噤不語手足抽掣眼目上視喉中鋸聲並皆治之

麝香

另研五分

硃砂

一兩

生黑豆

二錢半

草烏

三兩半燒存性

右為細末研勻破傷風以酒調一錢不拘時服如出箭頭先用酒調一錢就將此藥貼上箭瘡上

如聖散 治破傷風止血定痛

蒼朮

六兩

川烏

炮去皮

兩頭尖

炮各四兩

草烏

炮去皮

防風

細辛

各二兩半

白朮

川芎

白芷

各一兩半

蝎梢

微炒

雄黃

各半兩

右為細末每服一錢不拘時酒調下如損骨折乳香

五錢

一字散 治破傷風

金頭蜈蚣

一條去頭足炙

草烏

天麻

各半兩

全蝎

一錢 香白

芷

三錢

右為細末每服半錢如發熱茶清調下發寒溫酒調下不拘時服

發瘧仲景云諸瘧項強皆屬於溫又云太陽病發汗太

多致痙風病下之則痙復發汗則拘急瘡家發汗則痙
是汗下重亡津液所致有汗而不惡寒曰柔痙以風能
散氣也宜白朮湯加桂心黃芪無汗而惡寒曰剛痙以
寒能澀血也宜葛根湯皆氣血內傷筋無所營而變非
風也杖瘡又勞傷氣血而變者當補氣血未應用獨參
湯手足冷加桂附緩則不救 詳見雜病第五 有一
患者內潰針出膿三五碗遂用大補之劑翌日熱甚汗
出足冷口噤腰背反張衆欲投發散之劑薛曰此氣血

虛極而變瘕也若認作風治則誤矣用十全大補等藥而愈此證多因傷寒汗下過度與產婦潰瘍氣血虧損所致但當調補氣血為善若服尅伐之劑多致不救有一患者兩月餘矣瘡口未完因怒發瘕瘡口出血此怒動肝火而為患耳用柴胡芩連山梔防風桔梗天麻釣藤鈎甘草治之頓愈劉宗厚先生云瘕有屬風火之熱內作者有因七情怒氣而作者亦有濕熱內盛痰涎壅遏經絡而作者惟宜補虛降火敦土平木清痰去濕

行氣之非有一患者服行氣之劑胸痞氣促食少體倦
色黯膿清此形氣俱虛之證也先用六君桔梗二劑胸
膈氣和後用補中益氣去升麻加茯苓半夏五味麥門
治之元氣漸復而愈若用前劑戕賊元氣多至不救

下血之非有一患者去其患處瘀血用四物柴胡紅花
治之焮痛頓止但寒熱口乾飲食少思用四物白朮茯
苓柴胡黃芩花粉四劑寒熱即退用六君芍歸藿香而
飲食進腐肉雖潰膿水清稀以前藥倍用參芪歸朮茯

苓二十餘劑腐肉雖潰膿水潮稠悞服下藥一鍾連瀉
四次患處色黯喜其脈不洪數乃以十全大補倍加肉
桂麥門五味數劑肉色紅活新肉漸生喜在壯年易於
調理又月餘而愈否則不救凡杖瘡跌撲之證患處如
有瘀血止宜砭去服壯元氣之劑蓋其氣血已損切不可
再用行氣下血之藥復損脾胃則營氣愈難運達於
下而反為敗證怯弱者多致天枉

寒藥之非有一患者腫痛數寒涼之藥欲內消瘀血反

致醫腿俱冷瘀血併胸腹痞悶薛急去所敷之藥以熱
童便酒洗患處服六君木香當歸傅回陽膏醫腿漸溫
又以前藥去木香加川芎藿香肉桂四劑瘀血解乃刺
之更以壯脾胃養氣血得痊蓋氣血得溫則行得寒則
凝寒極生熱變化為膿腐潰深大血氣既敗肌肉無由
而生欲望其生難矣 雲間曹子容為室人中風灌藥
誤咬去指半節焮痛寒熱外敷大黃等藥內服清熱敗
毒患處不痛不潰膿清寒熱愈甚薛曰此因涼藥遏絕

隧道而然也遂敷玉龍膏以散寒氣更服六君子湯以壯脾胃數日後患處微痛腫處漸消此陽氣運達患處也果出稠膿不數日半指潰脫更服托裏藥而斂上舍王天爵傷足焮腫內熱作渴外敷內服皆寒涼敗毒患處益腫而不潰且惡寒少食欲作嘔吐薛曰此氣血俱虛又因寒藥凝結隧道損傷胃氣以致前證耳遂用香砂六君子芎歸炮薑外證悉退惟體倦晡熱飲食不甘以補中益氣湯加地骨皮五味麥門治之而愈州

守王廷用傷指即用帛裹之瘀血內潰焮痛至手薛謂
宜解患處以出瘀血更用推陳致新之劑不信乃敷涼
藥痛雖少次日復作又敷之數日後手心背俱潰出
瘀穢膿水尚服敗毒之劑氣血益虛色黯膿清飲食少
思仍請予治投以壯脾胃生氣血之劑由是膿水漸稠
而愈

不疑之非有一患者發熱煩躁用四物黃芩紅花梔柴
山梔花粉煩熱已清瘀血深蓄欲針出之不從忽牙關

緊急患處作痛始針去膿血即安用托裏養血新肉漸長忽患處瘙痒此風熱也用祛風消毒之劑而痊

不補之非有一患者臀腿脹痛發熱煩躁刺去死血脹痛少寬熱躁愈甚此血脫邪火旺而然也急用獨參湯補之少愈又以健脾胃養氣血藥治之腐肉漸潰遂愈大抵此證宜預調補以顧收斂切不可伐其氣血不行補益以至不能收斂矣

湯火瘡

灸瘡

凡湯火傷急向火炙雖極痛強忍一時即不痛慎勿以冷物塌之及井底泥傅之使熱氣不出爛入肌肉

丹火燒以好酒洗之又以鹽傅其上如皮塌者以酒熬牛皮膠傅之如湯傷以淋過第二次灰渣傅立安

熱酒傷糯米粉炒黑末酒調傅之治湯火灼未成瘡者用艾白根燒灰雞子黃和傅之如成瘡用白蜜封之以竹中膜貼上日三

世治湯火瘡麩皮炒黑灰為末傅上神妙此方有補性

始終皆可用 治湯火瘡取舊烹銀爐中燒過焦黃土
研細如粉以生薑調於帛上貼之痛止一方用鎔銀鍋
子細末油調傅佳

干治火瘡未起梔子仁燒灰麻油和封之厚乃佳已成
瘡燒白糖灰粉傅之燥即瘥

用白糖
葛氏方

治湯火燒方

右用蕎麥麴炒黃色蜜水調傅如神

保生救苦散治火燒熱油所損或至肌肉亦脫一切犬

齧損傷并刀斧所傷用生寒水石不計多少為極細末
調塗之或乾上然不如油調其痛立止並不作膿無分
毫釐苦楚日近完成永無破傷風證

冰霜散 治火燒皮爛

寒水石

生

牡蠣

朴硝

青黛

輕粉

各等分

右為細末新水或小油調塗立止

治湯火所傷赤爛熱痛

赤石脂

寒水石

大黃

各等分

右為末以新汲水調塗傷處

治火燒

桐油

水銀

各等分

右二件以柳條不住手攪成膏再入大黃末石膏末和以牛皮膠入少水鎔開外用貓兒肚底毛細剪摻上貼之

綠白散治湯熨火燒疼痛用苦參不拘多少為細末每用以小油調搽

凡被傷熱油痛不可忍取廁下黑淤泥量傷大小斟酌多少次以老薑汁麻油十分之一共研令勻搽傷處立愈以青黛傳之亦妙

治湯火傷

大黃 黃芩 黃連 山梔子 黃蘗 知母

貝母 蜜陀僧 乳香 沒藥 輕粉 甘草

各等分

右為細末用雞子清加蜜調不佳手時時搥之

清涼膏 治湯潑火燒此藥止痛解毒潤肌生肉

梔子仁

黃連

去鬚

白芷

各二錢半

生地黃

二兩

葱白

十莖

黃蠟

半兩

清麻油

四兩

右細剉於油鐺中煎地黃焦黑色綿濾去滓澄清却於鐺內入蠟慢火熬候蠟消傾於磁盒內用時以雞羽搵少許塗瘡上以瘡為度

麻子膏 治火燒入肉爛壞

麻子

一合取仁碎

栢白皮

柳白皮

山梔子

碎

白芷

甘草

各二兩

右剉細以豬脂一斤煎三上三下去滓以塗瘡上日

三

黃蘗散 治湯火傷

黃蘗

大黃

朴硝

鷄子殼

寒水石

各等分

右為細末用水調塗極効

栢葉散 治湯火傷

栢葉

梔子仁

各一兩

胡粉

研半兩

右為細末以羊髓五六兩鎔化和藥以木椎研三五百遍一日三次塗之瘥

蛤粉散 治湯火傷

右以蛤蜊殼不拘多少炙焦黃色搗為細末用生油調如膏傅之如水仍無痕一方以蜜水調傅之疼立止不膿不瘕吳內翰居鄉中隣家釜翻一小兒自頭至踵皆傷急以傅之啼立止遂無恙唯纔傷隨手用即効少緩即不及當須先合以備用耳

治湯火燒瘡

右以側栢葉入臼中濕搗令極爛如泥冷水調作膏
傳傷處以帛子繫定三二日瘡當斂仍減癰一方燒
灰存性為末以雞子清調傳如乾再上或蜜調亦可
或搗末以脂調塗瘡上乾即易一方以山栢子葉爛
搗塗傳

治人向火生火斑成瘡有汁及治火氣入瘡

右用黃蘗薄荷為末乾摻之即愈一方用黃蘗皮為

末摻之立愈薄荷煎塗亦可

治火瘡敗壞用雲母粉同生羊髓和塗之

經治湯火瘡至妙用劉寄奴為末先以糯米漿雞翎掃傷處後搽藥末在上並不痛亦無痕大凡湯傷先用鹽末摻之護肉不壞然後傳藥 又方以榆白皮末豬脂油塗瘡愈

世治火湯瘡先以酒洗次以楊梅樹皮為末香油調傳治湯火瘡用髮一束香油煎以髮盡為度放冷搽患

處驗

精治中熱油及火燒除外痛以丹參八兩細剉以水微調取羊脂二斤煎三上三下以傅瘡上愈

止痛膏 治灸瘡及湯火傷日夜啼呼此藥止痛滅癰

松脂 羊脂 豬膏 黃蠟

各一分

右取松脂破銚中切脂爵蠟著松明上少頃銚內燒諸物皆消以杯盛汁傅之松明是肥松節也

神效當歸膏 治湯火瘡初起癰漿熱毒侵展焮赤痛

毒氣壅盛腐化成膿此藥飲口生肌拔熱毒止疼痛

當歸

黃蠟

各一兩

麻油

四兩

右將當歸入油煎令焦黑去滓次入黃蠟急攪化放冷以磁盒內用時以故帛子攤貼一方用白蠟

紫雪 治湯盪火燒疼不可忍或潰爛成惡瘡

右將松樹皮燒灰二錢瀝青一分研為細末清油調傅濕則乾摻忌冷水洗日三一方不用瀝青以松樹皮陰乾為細末入輕粉少許生油調傅如傅不住絹

帛縛定即生痂

治湯火傷

右用霜後芙蓉葉桑葉等分陰乾研為細末用蜜調塗傅之濕則乾摻

雞黃油 治湯火瘡

右用雞子煮熟去白用黃於銀石鍋內炒乾再炒直待都化作油去火毒毛翎掃下入韶粉夜明沙為末香油調傅濕則乾摻之

灸瘡止痛生肌散 治灸瘡

牡蠣

半兩
煨研

寒水石

煨研

滑石

研各
一分

右為細末凡用之時切護爪甲勿令中風仍須洗瘡
令淨然後摻藥薄薄令徧以軟綿帛繫之候肌生漸
用栢皮膏

栢皮膏 治灸瘡久不瘥

栢樹白皮

伏龍肝

各四兩

猪脂

半斤煉
為油

右同熬成膏濾去滓入磁器中每用時薄薄塗之上

以油紙隔輒帛裏

綠雲散 治灸瘡止痛

栢葉 芙蓉葉

並端午日午時採不拘多少陰乾

右為細末每遇灸瘡黑蓋子脫了即用水調少許如膏藥攤楮紙上貼之養膿更無痛楚

四時貼護方 治灸瘡未著痂及出膿久不合者

春以柳絮 夏以竹膜 秋以新綿 冬以免毛

右各隨時貼瘡上

內托黃芪丸 治鍼灸傷經絡流膿不止

黃芪

八兩

當歸

洗三兩

肉桂

去皮

木香

乳香

另研

沉香

各一

兩

萊豆粉

四兩

右為細末生薑汁煮糊為丸如梧桐子大每服五十丸不拘時白湯送下

諸蟲獸螫傷

通治聖惠治蛇咬蠍螫蠱咬妙

雄黃

錢三

信

錢一

皂角子

巴豆

各九

粒

四十

耳塞

麝香

各少
許

右五月五日不聞雞犬婦人處不語搗為細末在杏
子核內封之鍼挑出上痛處大有神効

世治一切蛇蟲傷貝母末酒調服効

詳見
蛇咬

又方用酥

和鹽傳之 又方用益母草搗爛厚蠶傷處 又方用

鵝糞傳之 又方扁豆葉搗爛傳 又方用獨蒜酸漿

草搗傳傷處 又方用酒暖洗瘡上日三次 又方紫

蘇葉油浸塗傷處

山諸般惡蟲咬以油浸紫草塗之

丹治蛇咬蠶咬惡蟲咬猪膏每搗汁傅

陳藏器
治狗咬

治山溪中沙虱射工等毒用葱小蒜茱萸煮汁浸或搗
傳大効

治二十七般蟲咬傷人及瘡腫者用麝香雄黃乳香礪
砂各二錢土蜂窩露蜂窩燒灰存性研細以醋調少許
塗咬處或不能辨認疑是惡瘡三五日不療即毒入心
難瘥忌雞魚油膩物

治蛇傷犬咬一切蟲毒用試草搗爛貼之

治蛇犬及狂狗咬用蚯蚓糞和鹽研傅神効

海治蠍蜘蛛蛇毒雞卵輕敲一小孔合咬處即瘥 又

方先問被傷人是甚蟲傷即默念火德星君黑殺攝吹
在傷處自然不痛 又方用艾炷於傷處灸三五壯拔

去毒即愈

治毒蛇并射工沙虱等傷眼黑口噤手脚強直毒攻腹
內成塊遂巡不救用蒼耳嫩葉一握研取汁溫酒和灌

之將滓厚罨所傷處

簡治毒蛇射工沙虱等物傷著人眼黑口噤手足強直
毒氣入腹用白礬甘草等分為細末每服二錢冷水調
下

治諸蛇蟲傷毒用青黛雄黃等分新汲水調服二錢
又方用蒼耳嫩葉一握搗汁溫酒和飲滓厚傳傷處口
噤身強者灌之

治蛇犬咬即破傷風用荔枝草一握約三兩以好酒二

椀煎至一椀服即睡出汗汗不止以溫白粥補之

治惡蛇風犬傷用雄黃草撥細辛等分入麝少許為末
每服二錢好酒調下

毒蛇咬治毒蛇傷急以小便洗出血次取口中唾塗之

又以牙塗封傷處傳而護之甚妙且不痛腫

山居云用
犬糞傳患

處亦
佳

又方用好醋一二碗服令毒氣不隨血走或飲

清油一二盞亦可及以頭繩扎定傷處兩頭次用白芷
末半兩白水調服頃刻咬處黃水出盡腫消 又方用

白礬雄黃黃臘等分丸如指頭大遇有著傷燈上燒開
滴傷處或以竹筒按上滴入則毒不散

世路行卒被蛇咬當急扯裹脚帶札縛傷處上下寸許
使毒氣不能恢傷肌體又急用白礬安刀頭火上鎔汁
沸滴於傷處待冷以長篦子速挑去靨則毒血隨出點
腫尚未退更滴之以退為度 村居山僻及途中夜行
卒被蛇傷咬難求白礬處速作艾炷灸五壯以唾調鹽
塗之如點腫尚未消釋當更灸更搽毒涎自然流出且

不透裏傷人

蜈蚣咬亦宜灸

世治一切毒蛇咬用透明雄黃研細末以醇酒濃調厚搽傷處水流出如涎痛腫即消一方以萵苣汁和雄黃末作餅子候乾為末每用少許貼瘡口立効

衍有人被毒蛇所傷已昏困有老僧以酒調藥二錢灌之遂甦及以藥滓塗患處良久復灌二錢其苦皆去問之乃五靈脂一兩雄黃半兩同為末止此耳後有中毒者用之無不効驗又方用乾薑雄黃等分為末傅之

兼辟蛇用絹袋盛繫臂上男左女右蛇聞氣遠避

世治毒蛇所傷

細辛 香白芷

各五錢

雄黃

二錢

右為末加麝香少許每服二錢溫酒調服効

丹治一切蛇咬用香白芷嚼碎傅患處又用溫酒調服効
水蓼搗汁飲滓傅傷處 櫻桃葉絞汁服滓傅傷處

世治一切蛇蟲所傷用貝母為末酒調令病人盡量飲

之頃久酒自傷處為水流出候水盡却以藥滓傅瘡上即愈 治蛇咬腫毒悶欲死者用重臺六分續隨子六顆去皮同為細末以酒服方寸匕又以唾調少許傅患

處立安

崔氏海上方

又方用白礬二錢服之防毒氣攻心

又方金線重樓以水磨少許傅咬處又為細末酒服之 又方用栢樹葉魚腥草地松節皺面草草決明共一處研細傅傷處極佳 地榆生搗汁飲之及濃煎漬之半日愈 治蛇傷用馬蘭草即堦前菊生搗傅傷處

亦解酒疽止鼻衄合金瘡 治蛇咬瘡用蒜去皮一升
搗破以童便一升煮三四沸熱潰損處一兩時初咬未
腫即嚼蒜封之六七易 又方用蒜一升乳二升煮爛
空腹頻服以飯壓之次日依前再服

治諸惡蟲蛇螫用地菰搗傳之

海治蛇虺咬人以獨頭蒜酸漿草搗汁傳咬處佳

海治蛇咬男子陰毛口含二十莖嚥其津毒不入腹

世治諸般蛇咬此傳之於擒蛇者藥味不全亦可

大青 小青 青木香 烏柏葉 火煨草 山

蕨箕 過山龍 地蜈蚣 天門冬 白芍藥

香薷

右細末用白木香研細生白酒調服查罨咬處累効
聖治蛇咬毒食茱萸一兩為細末冷水調分為三服立
瘥

丹治蛇毒喫菰蔣草根灰取以封之其草即野茭白是
也
廣濟方
蛇咬作瘡暖酒浸日三次 絲瓜根搗生酒

飲醉立愈 治蛇傷用小青一握細研入香白芷半兩
酒調服却以手捻患處候黃水出為効 毒蛇傷人目
黑口噤青氣入腹以甘草白礬等分末之冷水調下二
錢蒜一升乳二升煮食仍煮童便熱漬之 麻油米醋
並急飲二盃毒即散 犬糞塗之 頭垢耳塞并泥蚯
蚓糞和搗塗咬處黃水出愈 一方加白丁香

蛇咬忌食酸物梅子犯之大痛

蛇入人口并七孔中者割猪母尾頭瀝血著口中并孔

口上即出

聖治因熱取涼睡有蛇入口中挽不出者用刀破蛇尾
內生椒二三粒裹著即出

治卒為蛇繞不解以熱湯淋之無湯令人尿之

蜈蚣咬治蜈蚣咬生雞血傅上立愈累効一男子為蜈
蚣入咽喉中咬之垂死之際一醫令殺生雞血乘熱灌
喉中蜈蚣即出而愈實良方也 又方用雞糞塗之

又方治蜈蚣諸毒蟲傷麻油點燈於瘡口上對口熏之

登時愈 又法大油紙燃燒燈吹滅以餘煙焯之亦治
蠍及諸毒傷 治蜈蚣咬竹葉清研汁傳之立愈 又
方用南星磨汁傳之累効 蜈蚣草曬乾為末入鹽少
許水調傳患處能解諸毒

梅治蜈蚣咬痛不止獨頭蒜磨螫處立愈

聖治蜈蚣咬方用蝸牛搗取汁滴入咬處

孫蜈蚣咬取蜘蛛一枚安咬處當自飲毒如蜘蛛死而
痛未止更易生

丹蜈蚣咬嚼鹽傳其傷處次以鹽湯洗之

梅師方

蜈蚣

咬頭垢塞之不痛則痒

治蜈蚣咬及諸蟲咬毒先用

鞋底上擦之用大蒜小蒜桑葉罨傷處如無用油敗盦

傷處或藍靛塗罨之亦効 治蜈蚣毒蟲咬用桑枝汁

同鹽擦痛處或鎔黃蠟滴患處肉黑為度 又方用皂

角於咬處上用艾炙熱去之効 用生薑汁調雄黃末

傅 又方灰莧葉擦其痛即止 又方燈草蘸香油點

煙薰之 又方凡被傷急以手指於地上乾處畫王字

內撮土摻在咬處即愈 又方用耳塞少許塗咬處疼
即立 又方用茱萸嚼爛擦之 又方用生薑汁調蚌
粉搽

蠼螋傷治蠼螋尿成瘡初如粟漸大如豆如火燒泡大
痛者速以草茶細末生油調傳瘡上立止甚妙

又方猪
膏每搗

汁傳之草茶
即茶茗也

治兩點蠼螋瘡用百合搗爛入鹽少許

傳之効

千治蠼螋尿人影著便令人病瘡如粟粒累累痛似刺

蟲所螫惡寒壯熱用犀角磨汁塗之則愈

世蠼螋蟲又名八脚蟲隱壁間以尿射人徧身生瘡如湯火傷用烏雞翎毛燒灰雞子白塗之 治小兒蠼螋咬遶腹匝即死用梨葉研爛敷之

食蠼螋尿瘡鹽三升水一斗煮取六升以綿浸湯淹瘡上

蠼螋雄黃消毒膏 實鑑 治蝎螫不可忍

雄黃 信 各半 巴豆 三錢 白礬 生一兩

右為細末黃蠟半兩鎔開入藥攪勻為錠子如棗子
大用時將錠子簽於燈焰上炙開滴於螫著處其痛
立止

潔一上散 治蝎螫痛

半夏

一字生用
為細末

雄黃

一字
另研

巴豆

一箇去皮
研如泥

右三味同研和勻上之 治蝎毒用鎔化白礬乘熱
滴傷處痛止毒出

廣治蝎螫人研蜘蛛汁傳之瘥

山蝎螫苦蕒汁塗之

世治蝎螫地磨生薑塗之 又方南星末醋調擦之人

參嚼封之 白礬半夏等分為末醋調貼痛止毒出

又方用葱白切一片厚二分置螫處灸三五壯

蜂螫治蜂螫薄荷貼之瘥 人參嚼封之 以酥傅之

醋磨雄黃塗

蜂房末豬脂調傅

煎湯洗亦得

黃蜂螫

熱酒洗之立効 又方清油搽之愈

蜘蛛咬張薦昔在劍南為張延賞判官忽被班蜘蛛咬

項上一宿咬處有二道赤色細如筋繞項上從胃前至
心經二宿頭面腫疼如數升盆大肚漸腫幾至不救張
相素重薦因出家財五百千并薦家財五百千募能療
者忽一人應召云可治張相初不甚信欲驗其方遂令
目前合藥其人云不惜方當療人性命耳遂取大藍汁
一甕碗取蜘蛛投入藍汁良久方出甚困不能動又別
搗藍汁復加麝香雄黃和之更取一蜘蛛投汁中隨化
為水張相及諸人甚異之遂令點於咬處兩月內悉愈

但咬處作小瘡痂落如舊

海蜘蛛咬偏身成瘡用青葱葉一莖小頭作一孔盛蚯蚓一條捏兩頭不令透氣搖動化為水點咬處瘥治蜘蛛瘡用羊乳傳其上或用清油搽之即安

丹蜘蛛咬處嚼韭白傳之

山蜘蛛等諸般蟲咬用葛粉生薑汁調傳

經蜘蛛咬嚙和山豆根末塗之狗咬虬蟥瘡蛇咬並水

研山豆根傳之

虬類脂切虬蟥火螳也螳即蟻

又方蜘蛛咬一身生

絲羊乳一件飲之 灰藿搗碎和油傅之

沈存中秦皮一味治天蛇毒此瘡似癩而非癩也天蛇

即草間黃花蜘蛛人被其螫仍為露所濡乃成此疾以

秦皮煮汁一斗飲之瘥

壁鏡

大如蜘蛛而形扁斑色
八足而長作白幕加錢

貼牆
壁間咬毒人必死用桑柴燒灰水煎三四沸濾汁傅瘡

上兼治蛇毒 又方雄黃醋磨搽妙 又方大黃研醋

煮水塗妙

刺毛蟲傷春夏月樹下墻塹間有一等雜色毛蟲極毒

凡人觸著者則放毛入人手足上自皮至肉自肉至骨其初皮肉微痒以漸至痛經數日痒在外而痛在內用手抓搔或痒或痛必致骨肉皆爛有性命之憂此名中射工毒諸藥不効用好豆豉約一碗清油半盞拌豉搗爛厚傅痛痒處經一時久豉氣透骨則引出蟲毛紛紛可見取下豆豉埋在土中煎香白芷湯洗痛處如肉已爛用海螵蛸即烏賊魚骨為末傅之愈 一方取蒲公英根莖白汁傅之立瘥 又方用鍋底黃土為末以酸

醋捏成團於痒痛處搓轉其毛皆出在土上痛痒立止

神効無比

黃土即伏龍肝也

按治刺蝥傷無如甘草妙口內

細嚼傅之即時瘡愈今蘇州虎邱山下民家皆以種植樹

木為生周十里內無刺蝥乃時用甘草汁灑樹故也

蚯蚓傷治蚰蟥吹用老茶葉細末調傅

丹治蚯蚓咬如大風狀眉髯皆落夜則蚯蚓鳴於身上

濃作鹽湯浸數次安

傳信方

行昔有病腹大夜聞蚯蚓鳴於身有人教用鹽水浸之

而瘡

螻蛄咬治螻蛄咬用槲葉燒灰細研以泔別浸槲葉取洗瘡拭乾納少許灰於瘡中 又方治螻蛄咬人用石灰醋和塗之

蠶咬用麝香研蜜調傅 又方用苧根搗汁飲塗

若以苧近

蠶種則蠶不生

犬咬犬咬人屎傅之 犬咬人以頭垢傅傷處又用熱

牛糞塗於外

肘後方

行犬傷人用杏仁量所傷大小嚼爛沃破處以帛繫定立瘥

世治犬咬用杏仁去皮尖同馬蘭根研細先以葱湯洗後以此藥塗傷處効 治犬咬傷用草麻子五十粒去殼以井水研成膏先以鹽水洗咬處次以此膏傅貼一方用虎骨屑傅之 治犬咬人不要洗用紅炭火

以物擊細待冷取塗咬處即愈 治犬咬用黃荊葉搗罨瘡上即安 又方炙生薑乘熱擦之尤妙 又方輒

青和牛糞塗

丹狗咬用紫蘇葉口嚼碎塗之 犬咬破傷風腫以人參於桑柴火上燒成灰末傅之安

羅蟬花散 治夏月犬傷及諸般損傷蛆蟲極盛臭惡不可近者

蛇退皮

一兩火燒存性

蟬殼

青黛

各半兩

細辛

二錢五分

右為細末每服三錢酒調下如六畜損傷成瘡用酒灌下如犬咬傷用醇子和喫蛆皆化為水蠅子不敢

再落又以寒水石末乾摻上

癩犬咬定風散 治風犬咬先口噙漿水洗淨用綿拭
乾貼藥更不再發大有神効

天南星防風

各等分

右為細末乾上更不再發無膿効不可具述

丹治犬咬梔子皮燒灰石硫黃等分研細傳瘡

梅師方

世治風狗咬用桃核殼半箇將野人乾糞填滿以榆皮
蓋定罨於傷處又用艾於桃核上灸十四壯即愈永不

再發

或用野犬糞如前法灸之

又方艾灸傷處五七壯

山風狗咬即用犬糞塗仍拔去頂上紅髮

世癩狗咬方用蟹螯七枚去頭足翅以糯米少許於新瓦上同炒以米黃香為度去米不用以蟹螯研碎好酒調下能飲人再進酒一杯傷在上食後服在下空腹服當日必有毒物從小便出如小狗狀如未下次日再進亦不下又進以毒物出為度若進至七服雖不下毒亦不妨矣服藥後腹中必不安小便莖中刺痛者不必慮

此毒受攻將下耳痛甚者以蕪青一匙煎甘草湯送下
即止如無蕪青青黛亦可疾愈後急以香白芷多雄黃
少許為末搗韭根自然汁湯酒調下去蟹蝥毒以水淨
漱口嚼生葱白罨傷處留小竅子出毒氣不可用他草
藥罨忌犬豬羊及發風毒物小兒量歲數加減蟹蝥食
癩狗肉致病者治同即愈或過二三年再發治如前
治癩狗所傷用蟹蝥二十一箇去頭翅并足用糯米一
勺先將七箇入米內微火炒不令米赤去此蟹蝥別用

七箇再於前米內炒令蟹螯色變復去之又別用七箇如前法炒以米出青煙為度去蟹螯不用以米研為粉用冷水入清油少許空心調服頃又再進一服以小便利下惡物為度如不利再進一服利後腹肚疼痛急用冷水調青靛服之以解其毒否則有傷或煎黃連水亦不宜便食熱物或以益元散水調服尤妙又方用米泔洗淨以沙糖塗之後用益元散四兩蟹螯十四箇去頭翅足煎空心溫服又方用雄黃五錢麝香五分

研勻酒調二錢服下去惡物再服得睡莫驚覺或經久復發亦宜此服

世風狗咬取小兒胎髮炒香傳野菊花研細酒調服盡
醉止効 又方韭菜根搗汁二三盞服 又方桃白皮
一握水二盞煎一盞服

世治癩犬所傷或經久復發無藥可療者用之極驗

雄黃

色極明者五錢

麝香

五分

右研勻用酒調二錢服如不肯服者則撚其鼻而灌

之服藥後必使得睡切勿驚起任其自醒俟利下惡物再進前藥則見効矣

丹癡犬咬人搗地黃汁飲之并塗瘡口愈 又方煮地

榆汁飲之兼細末傅瘡上服方寸匕日三忌酒若瘡瘥

者搗生韭汁飲一二升

梅師肘後同

風犬咬後毒發如狗

叫聲於化人壇拾頭頂骨燒末傅之 風犬咬毒發如

狗叫者百方不治以人骨燒末之水下方寸匕雖煩亂

者亦治

梅師方

膽礬為末貼瘡立愈

馬咬細嚼栗子傅傷處 又方用益母草細切和醋炒封之 毒入心馬齒莧湯飲之瘥

鼠咬用猫兒毛燒灰傅之 猫糞填咬處 麝香末傅包之

人咬龜甲或鼈甲燒為灰末之香油調傅

虎咬用野生菜搗爛塞所傷孔中滿不必換自然新肉長出而愈曾有人被咬已死用此方治之

丹熊虎傷毒痛煮生鉄令有味以洗之 虎傷人

肘後方

瘡取青布緊捲燒一頭內竹筒中射瘡口令煙熏入瘡

口中佳

梅師方

清油洗瘡口仍喫清油一椀 又方用

乾葛濃煎湯洗 又方用沙糖水調塗仍服沙糖水一

兩碗

世虎傷人瘡用莓子葉杵細塗之

按本草莓子葉即猪膏莓能治虎犬咬傷

熊咬熊咬用燒青布熏瘡中毒出仍煮葛根濃汁以洗
之日十次并搗葛根為散煮葛根汁方寸匕日五服瘥
驢涎馬汗瘡驢涎馬汗入瘡腫漸甚可急治之遲則毒

深不治以生烏頭末傅瘡口上良久黃水出立安

世治驢涎馬汗入瘡用遠志去心為末酒調塗 又方

用冬瓜青皮陰乾為末貼瘡上 又方馬汗人肉毒氣

引人如紅線者急用烏梅肉嚼爛塗瘡上 一方用烏


梅和核爛研用好醋和成膏先將瘡口針破出毒紫紅

血拭乾傅上以帛縛定 王氏治驢涎馬汗毒所傷白

礬飛過黃丹炒令紫色各等分相裏合以貼患處

孟馬齒莧又主馬毒瘡以水煎令服一升一半塗瘡上

濕癬白禿以馬齒膏和灰塗効



證治準繩卷一百二十